



Selasa, 16 Juli 2024

Ogen : Sakaria 4: 6-10a



Rumah Pertoton mejile tuhu



Majekken Rumah pertoton paska mulih i bas pembuangan nari tentu labo dahin si mesukah. Bage me Serubabel ngaloken dahin si mbelin i bas Tuhan nari tapi mberat kal nge. Sabap desken deleng galangna si ngambati dahin si idahiken Serubabel i bas majekken Rumah Pertoton e. Banci kin lang adi edenga mulih arah pembuangan, rayat Israel pe sangana patah semangat janah lit ka ancamen, serangen arah bangsa-bangsa sekitar Jerusalem.

Tapi Tuhan nuruh Sakaria guna mpersingeti Serubabel maka dahin si idahikenna e perlu sada gegeh si mbelin, belinen asangken gegeh militer. Gegeh si mbeli e e ialoken i bas Tuhan nari e me Kesah Tuhan jine. Alu jaminen penampat Tuhan arah Kesah Tuhan, maka deleng si ngambati pe banci kendit. E maka terusken Serubabel lah dahinna guna majekken Rumah Pertoton maka dung kenca itamakenna batu si perpodina, kerina pagi kalak ersurak meriah dengen ngatakensa maka Rumah Pertoton Tuhan e mejile kal. E maka arah padan Tuhan e, Serubabel tetap nerusken pembangunen Rumah Pertoton e aminna pe melet akap kalak pendahinna tapi Serubabel tetap ndahikensa alu tutus maka meriah kal ukurna.

Uga kita? Me meriah nge ukurta guna mbangun ntah mpekena-kena gerejanta? Me labo kita jungut-jungut kerna si e? Janah pesimis kita, katawari nge dungna e? ingetlah maka Tuhan tetap ngarak-ngarak dahin-dahin i bas majekken ras mpesikap Rumah PertotonNa. Amin pe mbue deleng si galang ngambati tapi pasti kendit kerinana! Labo itadingken Tuhan anak-anakNa si tutus erdahin majekken ras mpekena-kena rumah pertoton. Tuhan mereken gegeh si mbelin man banta seh maka la murah kita kelesehen.

Kesah Tuhan ulu gegehta

